



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 6

Alimayangertsü atema India-Australia nati amaliteper: Albanese

Meghalaya Assembly Speaker asütsü Thomas A Sangma shimogo

VOL. XX NO. 147 (ADOK 147) DIMAPUR ROGONÜ (FRIDAY)

METSÜREMI (MARCH) 10, 2023

₹ 5.00

Nagaland Municipal Council aser Town Council election agitsü

Dimapur, Metsüremi/March 09 (TYO): Nagaland nung tetsürtem asoshi menden shilem 33 wazüka yutsür Municipal Councils aser Town Councils election agitsü atema Nagaland sorkari March 9, 2023 nü metetdaksüogo.

Iba dak sendakba nung State Election Commissioner, Nagaland, T. Mhabeno Yanthan, IAS ajanga state kübok Municipal Councils asem aser Town Councils 36 nung election agitsü asoshi sentong telemsa metetdaksüogo.

Nagaland Municipal Rules 2003 indang Rules 54 kübok dangar tenüng nung vote agütsüba nungi kumzükä alitsü mechi State Election Commission ajanga state nung Municipal Councils aser Town Councils atema General

Election asoshi voters ajak jangjatsü teletetba agi. Iba dak sendakba nung State Election Commission ajanga teinyaktsütem temeja metetdaksütsü.

Iba sangdong nung 'Election Programme' sangdongba ajanga State Election Commission-i adopt asüba Model Code of Conduct for guidance of political parties and candidates, 2004 nung Political Parties aser Candidates ajunga len anitsü asoshi Model Code of Conduct ajak tang nungi tenzükä election agitsü aliba Municipal aser Town Council tesemtem nung benoka amshitsü.

Iba ya State nung Candidates, Political Parties aser State Government Machinery ajunga nung amshitsü, ta sangdong ajanga ashi.

Sl. No	SCHEDULE OF PROGRAMME	DATE & TIME
1	Publication of Election Programme	9 th March 2023 (Thursday)
2	Period for filing of Nomination	3 rd -10 th April 2023 (Monday- Monday) (Up to 3:00 pm)
3	Consolidated list of Nomination shall be posted	11 th April 2023 (Tuesday)
4	Scrutiny of Nomination Papers	12 th -13 th April 2023 (Wednesday & Thursday)
5	List of validly Nominated Candidates shall be posted	14 th April 2023 (Friday)
6	Application for revision of the order of the Authority scrutinizing the Nomination	17 th -20 th April 2023 (Up to 3:00 pm) (Monday -Thursday)
7	Revision Application filed shall be decided	21 st April 2023 (Friday)
8	Last date for withdrawal of Candidature	24 th April 2023 (Monday) (Up to 3:00 pm)
9	List of Contesting Candidates and list of Polling stations shall be posted	24 th April 2023 (Monday) (After 3:00 pm)
10	Date of Poll	16 th May 2023 (Tuesday) (Between 7:00 am and 3:30 pm)
11	Date of Re-poll (if any)	18 th May 2023 (Thursday)
12	Counting & Declaration of Results	19 th May 2023 (Friday) (8:00 am onward, Counting Center/Hall)

Meghalaya: CM Conrad Sangma-i portfolios lemetsüogo

Shillong, Metsüremi/March 09 (Agencies): Meghalaya Chief Minister Conrad K Sangma-i Bresthostibarnü par council of minister tem nem portfolios lemetsüogo.

Sangma-i par NPP atema tongtipang department ajunga amai soita ayu aser yimteren tsütsü kangabo tongtipang masüba department tem alliance partner BJP, HSPDP aser UDP nem agitsü.

Chief Secretary DP Wahlang-i sangdong ka agütsüba nung Sangma-i Finance, Forest, Political, Personnel, IT, aser Mining and Geology department tem abentsü, ta shia lir.

Meghalaya nung Deputy CM ana lir aser ana rongnung Prestone Tynsong-i Home, PWD, District Council Affairs, aser Parliamentary Affairs departments abentsü.

Ano Deputy CM Sniawbhalang Dhar nem Urban Affairs,

Transport, Industries, aser Prison and Correctional Services department tem agitsü.

State cabinet nung tetsür M Ampareen Lyngdoh dang lir aser la nem Health and Family Welfare, Law, Information and Public Relations, aser Agriculture departments lemzüktsü.

BJP minister AL Hek nem Veterinary, Fisheries, Printing and Stationery, aser Secretariat Administration departments tem lemzüktsü.

UDP nungi Paul Lyngdoh nem Social Welfare, Tourism, Arts and Culture departments amdaktsür aser par külem party nungi Kyrmen Shylla nem Excise, Revenue aser Legal Metrology departments agitsü.

HSPDP nungi Shakliar Warji nem Sports and Youth Affairs, Labour, Registration and Stamps departments tem lemzüktsü.

Western Sumi Hoho-i khukhua aitsür

Dimapur, Metsüremi/March 09 (TYO): Naharbari, Dimapur nung Lok Sabha MP, Tokheho Yephthomi'er indang March 6, 2023 aonung injang khaloktsüba atema khukhua aitsür, ta Western Sumi Hoho sangdong ka ajanga ashi.

Iba ama temenen mapa ya ajaki aitsütsüla. Iba inyakyim ya ketdangsür temi kanga junga bushisingdangtsüla aser aibelener nem oziung agi melaba ama temerenshi agütsütsüla, ta Western Sumi Hoho ajangasa ashi.

Nagaland nung department balala anitsü mapa lemogo

Dimapur, Metsüremi/March 09 (TYO): Nagaland nung February 27, 2023 nü 14th Nagaland Legislative Assembly 2023 asoshi General Election agir March 2, 2023 nü vote azüngba sülen March 7, 2023 nü Chief Minister Neiphu Rio-i anir Deputy Chief Ministers ana aser Cabinet Minister toku tashi tenangzükba agi aser anogo ka lir March 9, 2023 nü portfolio tem lemogo.

Cabinet Secretary, J. Alam, IAS ajanga sangdong ka nung, Nagaland Chief Minister-i shisa agütsüba nung ajemdaker Nagaland Governor-i Government of Nagaland indang Rules of Executive Business indang Rules 5(1) nung mela aliba ama portfolio lemetsür, ta ashi.

Election magidang yongi NDPP-BJP alliance yanglur NDPP-i assembly constituency 40 aser BJP-i assembly constituency 20 nung toktepa liasü, kong NDPP-i menden 25 aser BJP-i menden 12 nung takok angu.

NDPP nungi par 25 rongnung par 13 züngsem tasen aser BJP nungi par trok züngsem tasen liasü.

CM aser Dy. CM ana densema cabinet züngsem 12 nung tetsür ka (Salhoutuonuo Kruse) lir, koba Nagaland nung mezüngbuba asütsü aser la nem Women Resources Development & Horticulture Department ketdangsütsü nungloksü.

Taoba kümsük nung ama Chief Minister Neiphu Rio-i Finance aser P&AR department tem den külemi danga minister tem nem melemzüktsüba department tem amtsü.

Tan kümsük atema Nagaland nung Deputy Chief Minister ana

(T.R. Zeliang aser Yanthungo Transformation, National Patton) shima lir aser tena Highways amtsü aser Yanthungo rongnung taoba chief minister Patton-i tesüiba mapang ama T.R. Zeliang-i Planning and Home den Border Affairs amtsü.

COUNCIL OF MINISTERS AND PORTFOLIOS		
1.	Neiphu Rio CHIEF MINISTER	Finance and also in-charge of Department of Personnel & Administrative Reforms; and all-important policy issues; and all other portfolios not allocated to any Minister.
DEPUTY CHIEF MINISTER :		
2.	Mr. TR Zeliang	Planning and Transformation Department, National Highway
3.	Mr. Yanthungo Patton	Home, Border Affairs
CABINET MINISTERS:		
4.	Mr. G. Kaito Aye	Roads & Bridges
5.	Mr. Jacob Zhimomi	Public Health Engineering, Cooperation
6.	Mr. K.G. Kenye	Power, Parliamentary Affairs
7.	Mr. P. Paiwang Konyak	Health & Family Welfare
8.	Mr. Metsubo Jamir	Rural Development, SIRD
9.	Mr. Temjen Imna Along	Tourism, Higher Education
10.	Mr. C.L. John Minister	Environment & Climate Change, Village Guard
11.	Ms. Salhoutuonuo Kruse	Women Resource Development & Horticulture
12.	Mr. P. Bashingmongba Chang	Minister Housing & Mechanical Engineering
ADVISORS AND PORTFOLIOS		
Sl.No	Name	Portfolio
1.	Mr. Noke Wangnao	Social Welfare
2.	Mr. Imkong L. Imchen	Information & Public Relations, Soil & Water Conservation
3.	Mr. K. Konngam Konyak	Treasuries & Accounts, Art & Culture
4.	Mr. Zhaleo Rio	Urban Development, Municipal Affairs
5.	Mr. H. Tovihoto Ayemi	Tribal Affairs
6.	Mr. Tongpang Ozukum	Water Resources
7.	Mr. K. Tokugha Sukhalu	Food & Civil Supply, Legal Metrology
8.	Mr. Kazheto Advisor	Husbandry & Veterinary Services
9.	Mr. Mhathung Yanthan	Agriculture
10.	Mr. S. Keosho Yimchunger	Youth Resources & Sports
11.	Mr. Kropol Vitsu	Prison, Printing & Stationery
12.	Mr. Moatoshi Longkumer	Labour, Employment & Skill Development, Excise
13.	Mr. T.N. Mannen	Law & Justice, Land Revenue
14.	Mr. A. Pangjung Jamir	Fishery & Aquatic Resources
15.	Dr. Kekhrielhoulie Yhome	School Education, SCERT
16.	Mr. Kudecho Khamo	Civil Administration Works Division, Taxes
17.	Mr. Z. Nyusietho Nyuthe	New and Renewable Energy, Nagaland State Disaster Management Authority
18.	Ms. Hekani Jakhalu Kense	Industries & Commerce
19.	Mr. Imkongmar	Minority Affairs, Sericulture
20.	Mr. Temjenmenba	Transport, Technical Education
21.	Mr. G. Ikuto Zhimomi	Land Resources
22.	Mr. W. Chingang Konyak	Geology & Mining, Department of Under Developed Areas
23.	Mr. S. Kiusumew Yimchunger	Fire & Emergency Services, Home Guard and Civil Defence
24.	Mr. Sethrongkyu	Information Technology & Communication, Economics & Statistics, Evaluation

Grade-III atema nübu shimba tsütsü NSF-i maneni ola adoker

Kohima, Metsüremi/March 09 (TYO): Sorkar mapa nung Grade-III asoshi nübu shimba nung viva-voice component atema shilem 12.5 aliba nungi shilem 5 kumjang ta Naga Students' Federation (NSF) ajanga akhangba nenshia ashi.

State nung kaketshir tentet tulutiba, NSF ajanga kangasa ajungshiba sülen Nagaland sorkar kübok Group-C services/posts atema tatidang agia nübu tetemsü shimtsü asoshi 2020 küm Nagaland Staff Selection Board (NSSB) amenok.

Kohima nung aliba Naga Club Building nung Bresthostibarnü osangbener senden ka nung jembidang, onoki viva-voice component ajemdaktsütsü akhangba tanü tashi magizük aser NSSB ajanga taoba küm Grade-III posts 600 atema written examination agiba result March 7 nü sangdongogo, ta NSF tir Kegwayhun Tep-i jashiseta ashi.

Tim masüba mapa meinyaki Grade-III posts tem ochishia shimtsü asoshi NSSB ya tentet saka viva-voice atema total marks nungi shilem 12.5 yutsüba ajanga kaketshir aser tejangrartemi temolung malemer, ta pai ashi.

Anungji viva-voice component atema marks shilem pongu mekumtsü tashi NSSB indang final result mesangdongtsüla, ta ashi.

NSSB nung viva-voice component nung tai pua state Chief Secretary dangi NSF ajanga Bodhbarnü shiti ka zülüogo aser yangji shilem pongu kumtsüba ajanga board-i tim masüba mapa inyaktsü lenmang temesüba kumdaktsütsü aser "Right Person for the Right Job" principle shidak amshitsü ta shia lir, ta Tep-i metetdaksü.

Nübu shimba nung ochishia inyaksangshitsü mechi November 11 aser 12, 2022 nung

agiba Combined Staff Recruitment Examination 2022 indang marks tem yimjak nung sangdongtsüla ta Federation ajanga NSSB dang mepishio, ta paisa ashi.

Ano Naga nung sobaliba nung ajemdaker sübosolemtsü tem kumzükä aser wazükä ayutsü mechi School Education Department dang sorkar aser nija kakets reju tem nung tang nungi tenzükä ita nung khen item abensüoshi agitsü tuyutsü NSF-i asüngdangogo.

Iba ya Naga nung sobaliba tajung dak sendakba aben-süoshi wazükä ayuba nung mera tulu asütsü, ta Tep-i ashi.

Paisa tawa agiba state assembly election nung takok anguba asoshi Neiphu Rio-i aniba sorkar den tepela lemsatper aser sorkar tasenbai Naga nung lanurtem terenlok asoshi rangloker inyaktsü NSF teimla lir, ta ashi.

Department of School Education-i metetdaksür

Dimapur, Metsüremi/March 9 (TYO): Department of School Education-i sangdong ka ajanga Constitution of India kübok Article 309 nung tashi agüja aliba dak ajemdaker Nagaland sorkari state/national/international level games/ sports asayamungtem nung shilem agiba kaketshirtem dak sendakba nung tetuyuba kar agütsüba metedaktsüogo.

- i. India/Nagaland sorkari agizüker aliba State/National/International Level jenjang nung Nagaland tenüng nungi asayamung balala nung shilem agiba kaketshirtemi pei azüngba school tem nung parnok attendance aser tang inyakyim nung taitok agütsütsü atema apply asütsü. Iba dak ajemdaker Institution tekolaktemi pa/la indang recommendation Director, Youth Resources & Sports, Nagaland ajanga NBSE mendenbuba dangi abentsü. Iba amala candidate tem indang application tem den külemi calling/participation/nomination letter mesüra State Government/Government of India-i agizüker aliba Federation/Association/Authority tapet ket nungi tanga kuli kaket tapet densema alitsüla.
- ii. State tenüng nungi shilem agiba candidate tem nem dang taitok agütsütsü. NBSE nem application magütsü tsüngda Director of Youth Resources & Sports, Nagaland, Kohima-i kaketshir ka ya state tenüng nungi asayaba asayar ka ta jangjatsüla.
- iii. Attendance/relaxation taitok asoshi candidate ka ya NBSE kübok aliba Institution ka nung züngoksemer alitsüla.
- iv. Sports Authority of India/Federation of Sports-i temelaba agütsüba aser Government of India-i agizüker aliba asayamungtem nung shilem agiba Candidates tem nem iba academic year kija atema Nagaland Board indang tatidang i.e. HSLC & HSSLC agütsütsü atema attendance shilem 15 tashi agi metongi aliba atemabo taitok agütsütsü. (Classes IX nungi XII tashi regular candidates tem

- v. HSLC/HSSLC Board tatidang agütsütsü pur shirnok state tenüng nungi National/International Level asayamungtem nung shilem agütsü lir, item kaketshirtem Class X mesüra XII nung attendance 65% tekübok lira parnok attendance matong aliba atema taitok agütsütsü atema NBSE Chairman-i asadangtsü, ajisüaka attendance 50% tekübokbosa masütsüla.
- vi. National/International asayamungtem nung shilem agütsü aliba kaketshirtem asayamung mapang aser Board tatidang i.e. HSLC & HSSLC mapang ka nung tenchitepra, NBSE-i parnok atema tatidang tongtibang agütsüba sülen mapang ka atakzüker tatidang ayongzüka katsütsü. Iba küm HSLC/HSSLC tatidang agütsütsü atema Board nem Individual Application Form (IAF) apply/submit asüba kaketshirtem atema dang iba provision ya amshitetsü. IAF filling up asütsü atema provision ya kaketshirtem ajak atema Board indang website www.nbsenl.edu.in nung angütsü. Tatidang agütsüba centre aser routine ya Board-i agütsütsü.
- vii. Item kaketshirtem atema re-examination mesüra re-scrutiny mesüra c o m p a r t m e n t a l examination mesüra overall ranking atema kecha provision malitsü.
- viii. Class temabai atutsü aliba kaketshirtem shirnok asayamung balala nung shilem agir parnok nem internal assessment/school-based examination/Board examinations atema taitok magütsütsü.
- ix. Institution tekolaktemi Classes V, VIII, IX aser XI nung azüngertem attendance shilem 15 agi metongra ajibo taitok agütsütsü. Institution tekolaktemi taitok agütsüba indang Director, Youth Resources & Sports, Nagaland, Kohima ajanga NBSE mendenbuba nem

- x. Asayar kaketshir ka State/National/International Level asayamungtem nung shilem agiba ajanga school-i ayongzüka agiba regular assessment /internal assessment /practical nung shilem magitetra school-i internal assessment, school based board examination agütsü atema anepalutsütsü.
- xi. State/National/International asayamungtem nung shilem agütsü shimmer aliba class XI nung azünger kaketshir kar danga internal assessment/practical nung shilem magitetra mesüra school-i ayongzükba tatidang nung shilem magitetra school temi item kaketshirtem atema Board indang question paper design aser pass criteria dak ajemdaker internal assessment balaka agütsü. School-i temelaba agütsü atema marks/result Board indang office nung benoktsü.
- xii. Classes VIII & IX kaketshir kar danga State asayamungtem nung shilem agiba ajanga tatidang phase (either Phase I or Phase II of the examination) mashi ka nung medentetera school-i item kaketshirtem atema iba phase nung subject ajak atema Board-i temelaba agütsüba anogo ka nung tatidang balaka ayongzüka katsütsü. Kaketshir ajak indang result Board nungi temelaba agütsü atema benoktsüla. Class VIII & IX atema Board indang question paper aser pass criteria ajak sülen school temi anidaktsüla.
- xiii. Class V nung azünger kaketshir kar danga State/National/International asayamung nung shilem agiba ajanga final tatidang magütsütetera school temi item kaketshirtem atema subject ajak nung tatidang balaka agütsü atema achaayangtsütsü. Tatidang agütsüba anogo aser result ya Directorate of School Education, Kohima-i temelaba agütsütsüla. Class V atema Directorate of School Education, Kohima indang question papers design aser pass criteria sülen anidaktsüla.

Longlen DC-i temepeshiba ka metetdaksü

Dimapur, Metsüremi/March 9 (TYO): March 9 nü nungi tenzüka March 31 nü tashi agütsü aliba taruba NBSE HSLC & HSSLC board tatidang dak sendakba nung Longleng Deputy Commissioner-i, kaketshirtem tatidang sunep sunepa agütsütetsü atema minprong kecha madokdaksütsü asoshi mepeshia metetdaksüogo.

DC-isa, tatidang ya kaketshirtem tarutsü atema kanga tongtibang lir aser parnok tatidang ya kecha tetsükdaksü aser minprong makai agütsükdaksütsü atema ajak khuret lir ta ashi.

Pai, lisopurtem ajaki teka amteper inyaksüti takhangba ka lir aser tatidang mapang lokti minprongtsüsa inyaksangshibatem kenyongi magizüktsü aser aibelenertem anema jenjang tapet agütsü ta metetdaksü.

Anungji lispor ajak dang Longleng jila süngjema toktsütsü aser minprong kecha malitsü

asert kaketshirtem mesüngjemteti kümdaktsütsüsa inyakyim kecha nunga shilem amgütsü atema tetuyuba agütsüba den iba tetuyuba sülen manidakertem anema temzüng ozüng kübok jenjang tapet agütsü, ta DC-isa kasa sangdong ajanga metetdaksü.

Kasa mapang nung Longleng District nung General Election 2023 takok ngua tembangba sülen Longleng nung General Election takok nung agütsü atema tentetba teams/committees/ squad tem ajak loksaba DC-i metetdaksüogo.

Iba amala mesükba committees/teams/squads mesüra Longleng District nung General Election dak sendakba maparen balala atem shimba nüburtem ajak parnok mapa nungi anisüngzük agütsüogo aser parnok ajak teti ama sorkar mapa balala nung sotaka inyaksangshitsü temelaba agütsüogo, ta kasa sangdong ajanga metetdaksü.

NU Kohima Campus nung International Women's Day amung

Dimapur, Metsüremi/March 9 (TYO): Nagaland University Kohima Campus nung anogo ka jelia March 7 nü International Women's Day mungogo.

Iba sentong ya "DigitAll: Innovation and Technology for Gender Equality" omen nung ajemdaker Women's Studies Centre-i ayongzüka liasü.

Sentong nung o jembiba mapang mejeta jaoker Department of English, Nagaland University nungi Prof. Rosemary Dziivichii-i, tetsürtem atema menden mekazüka toktsütsü kodang tongtibang iba indang jembiba, aser iba amala policy ya benoktsü atema ajungmesotsüla, kechiyong iba ajanga tetsürtem tejakleni aotsü atema lenmang lapoktsür ta ashi.

Laisa, state nung telemtetba balala agiba lokti tentet tematiba nung densemetsü atema tetsürtemi inyaka aruba indang bilemtetshia jembiba. Lai, cyber bullying, trolling aser harassment amala cyberspace nung tetsürtemi tetsükdaksüttem ajangshiba indang süoki ia bilemba lemsatop. Laisa, digital technology ajanga tetsürtem aser talisa yimdakyimtsüng nung aliba tetsürtem koba tashi ka tongteta ali iba indang asüngdangba den scientists aser iba wadang nung sendaka alirtem dang digital lima nung tetsürtem nem shilem tali agidaktsütsü atema jenjang tapet agütsü mepeshia.

Laisa, state nung telemtetba balala agiba lokti tentet tematiba nung densemetsü atema tetsürtemi inyaka aruba indang bilemtetshia jembiba. Lai, cyber bullying, trolling aser harassment amala cyberspace nung tetsürtemi tetsükdaksüttem ajangshiba indang süoki ia bilemba lemsatop. Laisa, digital technology ajanga tetsürtem aser talisa yimdakyimtsüng nung aliba tetsürtem koba tashi ka tongteta ali iba indang asüngdangba den scientists aser iba wadang nung sendaka alirtem dang digital lima nung tetsürtem nem shilem tali agidaktsütsü atema jenjang tapet agütsü mepeshia.

Maneni Prof. Rosemary-i, gender equality aser women empowerment dak sendakba nung teburtem nem tangazükba agütsütsü nungdakba indang jembiba. Laisa, teburtem dang tetsürtem ola angatsü mepeshi, koba ajanga lokti ajungketba nung shilem tulu ka agütsü, ta ashi.

Mejet jaokertem agizükba mapang Centre Director in Charge, Prof. Lungsang

Zeliang-i, tetsürtem nem aküm tetushi agüja sentong nung shilem agiba atema kanga pelaba lemsatop aser sentepa aliba lokti dang digital space nunga tetsür aser tebur na tsüngda tawa aliba tajemba kümdaktsütsü atema jenjang tapet agütsü ayongzüka liasü. Laisa tetsürtem renloka aoba nung tongtibang shilem agiba atema teburtem dang kanga pelaba lemsatop.

Kasa mapang nung Nagaland University, Kohima Campus, Administrative in Charge Prof. Buno Zetsuvi-i o tatsüka jembiba mapang International Women's Day koda amung tenzük aser alima ajunga nung tetsürtem pei temeden atema koda rara arudar iba indang lemsatop. Laisa, vote agütsütsü atema dena temeden magütsü aliba nungi tetsürtem renloka tangbo koda alima tesem balala nung temaba menden nung mena ali, iba indang jembiba.

Women Coordinator of Nagaland University Students' Union, Kohima Campus, Leizuyile-ia, tetsür o tebur na tsüngda kecha tebandang malitsü aser iba indang tangazükba agütsütsü ayongzüka liasü. Lai, technology ajanga tetsürtem taküm nung temelenshi bener arutsüba aser digital space nung tetsürtemi shilem agütsü koda tongtibang iba indang jembiba liasü.

Maneni sentong nung MA Education teburtemi iba anogo atema mejeta mejemba ken ka aten. Iba sentong ya Head, Department of Tenyidie Dr Petekhrienuo Sorhie lenisüba nung agi aser Department of Education nungi Dr Anu GS-i Tsüngrem temaotsü meshizüka sarasadema liasü. Sentong nungsa Department of Tenyidie nungi Dr Kethokhrienuo Belho-i tepela ojembia liasü.



Raj Bhavan, Kohima nung March 8, 2023 nü Nagaland Governor La. Ganesan-i tila-tanurtem den Holi benjongba noksa nung angur. Iba benjongmung nung officer aser staff kibongtem, Assam Rifles, CPT aser special branch dena liasü.



March 09, 2023 nü Narendra Modi stadium, Ahmedabad nung India aser Australia na tsungda 4buba test cricket match asayatsü lia Ato kilonser, Narendra Modi aser Australia Ato kilonser, Anthony Albanese na tangokba noksa nung angur.

Atishi-i Delhi Education Minister tenangzükba agi

New Delhi, Metsüremi/ March 09 (Agencies): Brihostibarnü Aam Aadmi Party MLA, Saurabh Bharadwaj-i Delhi Health Minister aser MLA, Atishi-i Education Minister tenangzükba agiogo.

Delhi Lt Governor, V K Saxena-i ketdangüsü tena nem tenangzükba agidaksü; iba sentong nungji AAP tongti aser Chief Minister, Arvind Kejriwal aser Delhi Assembly nung Opposition Lenir, Ramvir Singh Bidhur nata aden.

Atishi-i Education, PWD, Power aser Tourism departments reprangtsü aser Bharadwaj-i Health, Urban development, Water & Industries departments reprangtsü.

Delhi excise policy ochimashi ken o nung Delhi Deputy Chief Minister, Manish Sisodia-i minister menden toktsü aser ochimashi ken o ka nung Satyendar Jain-ia minister menden toktsü. Tang tenaprongla Tihar jail nung puoka lir. Cabinet menden tazüing ana adokba ajanga tena melen party MLA ana- Atishi aser Bharadwaj na minister shim.

Deputy CM, Sisodia-i Education portfolio-a repsema bena liasü.

Delhi excise policy ochimashi ken o nung Sisodia nem tai tonglokja taküm February 26 nü CBI-i pa apu aser yaküm May 30 nü senotsü ochimashi ken o ka dak sendakba nung Enforcement Directorate-i Jain apu.

Tenati minister menden nungi anenba shidi agütsüba sülen Tir, Droupadi Murmu-i shidi anapronglaji agizüka liasü.

Kejriwal-i benokba nung ajemdaker Delhi LG, Saxena-i Tir Murmu dang Atishi aser Bharadwaj na Cabinet minister shimtsü benoka liasü.

March 17 nü Delhi Assembly nung Budget senden tenzüksü lia Atishi aser Bharadwaj na minister kümogo. Bharadwaj ya 2013 küm nungi AAP MLA liasü aser tang Delhi Jal Board nunga vice-chairman inyaker. 2013 küm Kejriwal-i aniba mezüingbuba sorkar kümsük mapang nunga pa mapang tatsüka minister inyaka liasü.

Atishi-a 2020 küm nungi AAP MLA lir aser party tenzükba mapang nungi la party

ning inyaka aruogo. La ya Education Minister, Sisodia atema advisor teinyakdak liasü.

Minister tenangzükba agiba sülen osangbenertem den jembidang Atishi-i, AAP lenirtem- Manish Sisodia aser Satyendar Jain na jail nungi chiokba sülen tenati ano education aser health departments abentsü, ta metetdaksü.

"Linük nüchiso anguba sülen puti otsü asütsüsa Satyendar Jain aser Manish Sisodia nati health aser education minister ama kanga junga inyakogo. Lord Ram bendangleni aodang par adianu Bharat-i yimli reprangba ataba ama onoki yamaji inyaksü. Tena jail nungi chiokba sülen maneni tenati peipei ministry mapa agizüksü," ta lai ashi.

"Yamuna ayong merüktettsü kanga tongtibang. Onoki L-G nungi amalitep nungdaker. Ibaji inyaksü atema pa dang nungi temelega aginer. Pai (LG) onok maneni nokdang saka onoki maneni inyaker. Parnok tsütsülen nungi tetsükdaksü agütsüyonga onoki teinyaktsü tim inyaka arudar," ta laisa metetdaksü.

Alima yangertsü atema India-Australia nati amaliteper: Albanese

Ahmedabad, March 09 (Agencies): Brihostibarnü Australia Ato kilonser, Anthony Albanese-i, Gujarat stadium nung Border Gavaskar Trophy reprangba sülen India-Australia test match asaya medemdanga, linük anaprongla nungi team-i alima nung tajungtiba asütsü toktepa ama linük anati alima tajungba yangertsü atema amalitepa inyaker, ta ashi.

Ahmedabad nung aliba Narendra Modi Stadium nung Ato kilonser, Narendra Modi aser Australia Ato kilonser, Albanese nati cricket test match külemi reprang.

Tesülen Albanese-i twitter ajanga, "Cricket asaya meimba linük ana- Australia aser India na tesashi saka tembar ama

tokteper. Iba amai toktepyonga linük ana tsungda chichiba akhümtsübutep lir, linük ana nüburtem tsungda temeimtep lir aser tembar yimtep lir," ta metetdaksü.

"Asaya moapu nung Australia aser India nati alima nung tajungtiba asütsü atema tokteper. Asayaba moapu adener asenoki alima tajungba yangertsü atema amalitepa inyaker. Tanü Gujarat nung Ato kilonser @narendramodi kümati fourth test reprangogo," ta pai metetdaksü.

Ato kilonser, Modi-ia twitter ajanga, "Cricket ya India aser Australia napronglai meimba saisapong lir! Ahmedabad nung kü tembar tajung PM @AlboMP den külemi India-Australia Test Match

reprangtsü maongka anguba atema pelar. Iba asaya jangratemtsüsa asütsü ta ni bilemer," ta lemsatep.

Kasa anogo nungsa Australia Ato kilonseri Ahmedabad nung Sabarmati Ashram semdanga Mahatma Gandhi nem akhüm agütsü.

Ashram semdangba mapang nung Gujarat chief minister, Bhupendra Patel-a liasü.

Brihostibarnüsa Mumbai nung Confederation of Indian Industry (CII) aser Business Council of Australia (BCA) na tsungda amalitepa inyaksü atema tezüngzüktep ka agiogo. MoU nungji Australia Ato kilonser, Albanese aser India Union Minister of Commerce & Industry, Piyush Goyal nati süng súa liasü.

EC-i Karnataka assembly election atema terenemshiba asadangtsü

Bengaluru, March 09 (Agencies): Karnataka nung assembly election agitsü atema terenemshiba asadangtsü atema Brihostibarnü Chief Election Commissioner, Rajiv Kumar leniba nung Election Commission team Bengaluru tonga aruogo, ta ketdangsertemi metetdaksü.

Rajiv Kumar den election commissioner ana- Anup Chandra Pandey aser Arun Goel nungeri anogo asemnü Karnataka state semdang, aser iba mapang nungji parnoki taküm May ita nung agitsü aliba assembly election atema terenemshiba asadangtsü.

Parnok Bengaluru tonga aruba sülen Vikasa Soudha nung Karnataka nung Chief Electoral Officer (CEO), Manoj Kumar Meena aser tanga officers den senden mena liasü.

Election Commission team-isa yimtenren party balala nungi lenirtem ajurua election atema

parnok tebilemba onüktem angadangtsü.

Election Commission team-i 'Inclusive Elections and Elections Integrity' International Conference nunga adentsü, aser iba senden nungji democracy linük balala nungi election commissioner temia shilem agitsü.

March 10 nü Election Commission-i district ajak nungi deputy commissioners den senden mena taruba election atema terenemshiba asadangtsü.

Kasa anogo nung Election Commission-i election indang exhibition semzüksütsü aser voters nem awareness agütsüdang amshitsü atema LED vehicles semzüksütsü.

March 11, 2023 nü Bengaluru nung election commissioner temi osangbenertem senden ka ayongzuka amenba sülen Delhi-i meyipa aotsü.

 बैंक ऑफ बड़ोदा Bank of Baroda		CHUMUKEDIMA BRANCH OKM Building, NH-39, 4 A D Lane 5, Ward 6, Dimapur, Chumukedima, PIN- 797103
GARI TAYOKTSÜ LIR		
Bank of Baroda, Chumukedima Branch, Nagaland ajanga Ninotoli H Yephthomi atema finance sütsüba aser aibelener Borrower ket nungi soita aliba gari tayoktsü lir. Iba gari alitsü jangra alirtemi gari tsüngtong oa reprangtsü aser tejangja metettsü asoshi iba osang sangdonger den tongteprateptsü akok. Earnest Money Deposit (EMD) ama sen 2,00,000/- (Lakh Ana) indang refundable/adjustable Banker's Cheque/DD dener tezüluba nung agütsütsüla. Alitsü bilema alirtemi parnok offer ya sealed envelope tejaklen "Quotation for purchase of vehicle" aser Registration No. NL-07-CA-4562 zülur kasa ya iba sangdong agütsür ket 23.03.2023 nikongdang 4:00 ako tashinung tongtsütsüla. Sealed quotations ya 23.03.2023 nikongdang 5:00 ako nung Bank of Baroda, Chumukedima Branch, Nagaland telungzük nung offer agüja aliba gari alitsü tejangraba alirtem lia lapoktsü. Bid nung takok angur temi quoted price ajunga quotation lapoker mapa inyakba anogo pongu tsungta agütsütsüla mesüra Branch Head ajanga atsülangtsüba anogo tashinung tongtsütsüla, aji mesüra pai deposit asüba EMD ya mangutsü aser gari ya ayoktsü. Gari ya "As is where is" yimya nung ayoktsü aser Bank ajanga atakzuka yutsüba jenjang dang tajemba agi mayoktsü. Kuli balaka magütsü offers ajak mesüra kar agizüksü mesüra magizüksü temeden onok dak lir. Gari ya Bank mapa inyakba anogo aser mapang arua reprangtsü akok.		
Sl. No.	Vehicle Make and Description	Reserve Price
	Ford Endeavour 3.2 Titanium (NL-07-CA-4562)	Rs. 18,53,000/-
	Engine No.: KT16053 Chassis No.: MAJAXXMRWAKT16053 Year of Manufacture: 2019 Colour of Vehicle: Absolute Black	
Date: 07-03-2023		Branch Head
Place: Chumukedima		Bank of Baroda, Chumukedima Branch
 बैंक ऑफ बड़ोदा Bank of Baroda		KOHIMA BRANCH National Highway 61, Kohima, Nagaland- 797001 Email: kohima@bankofbaroda.co.in
[Rule 8(1)]		
KIOJEN AGIBA NOTICE (For Immovable Property)		
Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 8 nung agüja aliba tashi nung ajemdaker tsünglanglen sign süa aliba Bank of Baroda officer-i 02.12.2022 anogo nung Demand Notice ka ajanga sen apur Mr. Kevipusa Kezieo , S/o Late Suongulie Kezieo dang notice agütsüba anogo nungi tenzuka anogo 60 tsungda notice nung shia aliba ama sen 10,71,367.76 (Rupees Ten Lakhs Seventy One Thousand Three Hundred Sixty Seven and Paise Seventy Six Only) den külemi 02.12.2022 anogo nungi contractual rates nung sen tetemlok aser tanga charges agüjang, ta tuyua liasü.		
Ajisüaka sen apur/guarantor/mortgagor-i senji magütsütet nung sen apur/guarantor/mortgagor aser public dang, iba Act nung Section 13(4) aser Rule 9 nung agüja aliba tashi nung ajemdaker tsünglanglen sign süa aliri 2023 küm March 4 anogo nung tsünglanglen shia aliba kiojen agiadokogo.		
Sen apur/guarantor/mortgagor aser public dang iba kiojen dak sendakba nung kecha inyangsangshi masütsü metetdaksür, aser kari danga tetuyuba anema inyakra Bank of Baroda-i sen 10,71,367.76 (Rupees Ten Lakhs Seventy One Thousand Three Hundred Sixty Seven and Paise Seventy Six Only) den 30.07.2022 anogo nungi tenzuka contractual rates nung tetemlok aser tanga charges meshitsü.		
Sen apur dang Section 13 kübok sub-section (8) nung ajemdaker mapang shidak nung item kiojen alangzüksü akok.		
KIOJEN/ SECURITY		
Chiephobozou, District Kohima nung aliba Patta No. 280 agi ayimjemba ali tasazük 3600 Sq.ft. nung aliba ajak den building:		
Kiojen osang tejangja:		
North tsütsü sorkar li, South tsütsü sorkar li, East tsütsü sorkar li aser West tsütsü: Yapan'er kimong.		
Place: Kohima	Authorised Officer	
Date: 04-03-2023	Bank of Baroda, Kohima Branch	



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 10, 2022

Tetsürtemsasa masü

Tanü putu nung tetsürtem lokti, yimten aser arogo maparen ajak nung atongoka shilem agidaksütsü aser yimkong asoshi telemtetba agidaka tetsürtem ola aser tebilemba agitsüsa parnok tendaksütsü nungdakba indang kanga tongtibangsa jembir. Iba nungdakji yakanü ama alima ajunga nung Tetsürtem Anogomung amungba sentongtem nung kanga rongdak nungdaksa jembir. Atangji, alima kar nungbo tetsürtem yimten aser lokti nung telemtetba agidak shilem agidaksütsü bajibo yutsür kaketrejuia meyoker aser tetsüing-teben aser tejak ngua süoshia magidaksütsür. Ano, alima tesem aika nung tetsür kisüingbo pei yimtak aser kiyong nunga tetsübu agi mesenzüteter. Asen akhi sobaliba nunga tetsürtembo tanurtem den kasasa züingshi, iba jagi tetsür tanur ta jembia tetsürtembo yimten aser lokti ken o jembidaki marudaksü. Atangji, timtem lendong nunga tebur taintemi tetsür tanurtemji tama kümzüka ayutsü merang, anungji asen sobaliba nungbo tetsürtem yimten aser lokti nung shilem magidaksüsbaji mezüingmeshiba mapa ka masü saka khuret mebendaksütsü aser balaka shisamebuludaksütsü tebilemba aser tangatetba agi liasü. Ajisüaka, asenok sobaliba nunga tetsürtem mezüingmeshiba mapa kaji, tetsürtem nembu ali senmang mamangdaksür asünungji, tetsürtemjibo kibong kümer tangar meyong akümtsü, anungji parnokji süngolang-nübanglang ka ama dang bilema züingshi. Iba jagi tsüraburtemi senotsü aser mapang endoka tetsürtembo kaketshidaki meyok, kechiyong talangka azüingyonga tetsürjibo pi dangi yoktsü ta bilemba tangatetba dang liasü. Iba ama tangatetba jagi asen lima loktiliba nung tetsürtem mapang talangka tejakleni moudaksüi tajemrep tia nung yutsüogo. Tanü kibong aika nung tetsütem aika iba ama mangatet putu nung takoksa angurtem alitsü. Ajisüaka, tanübo asenok tetsürtem tangar lima tetsürtem den medemdangra, alima kin aika dang nungi Nagatsür aser Aotsür-sa jenjang tajungba, tetushiba aser temeimba nung teburtemi amshiba angutsü. Aji oda, kaketshisatsü aser rongsen bushiba mapatem nung, Naga nunger aser talisa Ao kin loktiliba nungbo, tetsür o tebur na kecha tebandang mali kasasa kümogo. Iba jagi kaketreju nung kaketshirtema tetsür teimba aser takoka tetsürtemi tajungba anguba asenoki angur. Ajisüaka, tanü tashi yimten nungang tetsürtemi teburtem den kasasa shilem magiteti lir. Atangji, Nagaland kümer küm 60 buba nung Nagaland tatar senden nung mentettsüsa taküm 2023 election nungbo tetsür anati takok nguogo. Iba jagi Nagatsürtema teburtem den yimten nunga kasasa shilem agi tenzüker asütsü. Atangji, Nagatsürtem yashi tashi Nagaland nung MLA mekümteti arubaji teburtemi nokdangba agi masü saka election nung toktepa yimya aser maparen kanga mejungi akümba ajanga tetsürtemi takok ngua metokteptet. Tetsür shibaibo sen agi vote alia aser tashiyim amshia election-i aitsü? Tanü Nagaland nung election agiba ochimashi aser tashiyim inyakba yimya ya Nagatsürtem dak mapet, iba jagi tetsürtemi shilem magitetter. Ajisüaka, Nagatsürtembo yimten inyakyim ajak shitak alidang dang ayongayonga pongoka aitsü ta mebilemstüla. Tanü ama election inyakyim tamajung merüktettsü atema tetsürtemi yimten nung teburtem den kasasa toktepa shilem agitsüla. Iba nungji teburtemi tetsürtem pusema nokdaksüla. Kibong nunga obalai tetsür o tebur na kasasa ta mangatet asübo, tang tashi tetsürtembo talanglang mezüingdaksüla. Iba amaji tang Naga tsür MLA ana adokbajia teburtemi meyari aser menungit asübo madokla. Tebur o tetsür na ya balala saka kati ka mali melitettsüsa kasasa yangluja lir. Aji oda, teburtema yimten aser lokti nung shilem agitetbaji tetsürtemi nungitba ajanga agitetter, kasaji tetsürtem yimten aser lokti nung teburtem den kasasa shilem agitettsüsa teburtemi yaritsüla. Shitakba agibo, Alima Tetsürtem Anogomung ya tetsürtemi masü teburtemi mungtsütsüla. Atangji, tetsürtem tanü putu den sütepsütepa abensüoshi aser jembishinü nung dang masü saka pei kija kibong, yimten aser lokti mapa nung teburtem dang nungi tajungba aser teyakyakba inyaka otettsüsa technology amshiyim nunga tajangzük agütsütetba mapa takok tetsür asütsü nungdaker. Aji oda, tetsürtema peisasa nokdaktettsüba tesem aika lir saka ano tetsürtemsasa masü teburtemi yarisemtsüla tesem kar lir, aji teburtemi reprangtettsüla aser tetsürtemia nokdaktettsüla.

OLEMSABANG

IBA LIMA NUNG TAJUNG O TAMAJUNG NA MEDEMDANGA YAMAI ATALOKYONGA AOKBA ANGUR

-R.Imkong Lkr, Aolijen Mepu, C.T.C, Mokokchung

A	B
1. Nisungtem rongnung karibo teti tajung tang inyaksü bilema alir.	2. Saka nisungtem rongnung karibo kodaser karbosa ashioktsütsü ta tasa tamajung tang shisadanga alir.
2. Nisungtem rongnung karibo pai temang anepaluba den tangara junga lidaksütsü atema mapa tajung inyaka alir.	2. Saka nisungtem rongnung karibo peibo ajungtsü, saka tangarbo akoksatsütsü ta tasa tamajung tang atonga alir.
3. Nisungtem rongnung karibo ajak ajungtsü atema mapa tajung nung yariteptsü atema mulunga tang alir.	3. Saka nisungtem rongnung karibo tangartem külakokja yutsür, külenang pabo ulutsü tang teti bilema alir.
4. Nisungtem rongnung karibo pei akaba rongsen agi akok tashi tangartem den lemsateptsü aser timtema aliba purtem parnok asoshi aria bilemstür.	4. Saka nisungtem rongnung karibo tangar kar külakokja ashioktsür külenang pa ajungtsü atema maparen tenzüka aotsü tang bilemer.
5. Nisungtem rongnung karibo pei timtembaji tezülen yutsür tangar timtemertem pei rongsen agi yaria parnok tepela ngudaksüba nung tang jangra atemer.	5. Nisungtem rongnung karibo pei medemertem dena ashiokja ludaksür, külen iba nung jagi pa taküm pelaseta jangratema alitsü meranger.
6. Sayutsüingirtem rongnung karibo Tsüingrem Tanela jazüka kar shisabulua aser timtema aliba purtem nem tesünep aser tepela agütsür.	6. Saka sayutsüingirtem rongnung karibo pei-i sayutsüingiba nungji Tsüingrem Tanelabo matenerser nung ali rongsen bendentsübo kanga tesangra alir, saka timtembapurtem nem tepela aser tesünepbo magütsüteter.
7. Nisungtem rongnung karibo mapa kanga meranga inyaksü jangrar, aser pai meranga inyakba anungi tajangzük anguba jagi tangar timtemertem yaria peladaksür.	7. Saka nisungtem rongnung karibo pa mesüra la azümesenba aser kulak-kübingba ajanga pa tu ochishir aser nisung tajung ka ama sayutetter.
8. Studenttem rongnung karibo lesson kodanga meranga azünger aser parnok jagi ochishia timtem jenti aremzüka azüingba ajanga küm tatem nung takok tulu nguteter aser tatem nung parnok jagi mapa tajung ngutetta timtemertem aika yaritetter.	8. Saka studenttem rongnung karibo kanga azümesenba ajanga küm tatem nung takok tajung menguteter, saka parnok jagi rongsen jenti lalua tesayurtem alizüker aser takoker rongnung atener, saka pa mesüra la tu degree anguba tang ashi temetetba mali nungji mapabo menguteter.
9. Tesayurtem rongnung karibo pei-i sayuba studenttemji ochiba tanela agi oda pei chir amatu sayuteta doktsüba jagi tarutsü mapangtem nung pai mesüra lai sayautetba tanurtem jagi kin ka yangertettsüsa sayuteta doktsür.	9. Saka tesayurtem rongnung karibo pei-i meteta akaba shisatsü ajak agibo mesayuba ajanga studenttemi aibelena angazüker, tetezü par mesüra lar studenttem nemji pai meteta akaba ajakji sayura asüingbo parnok jagi pa mesüra laji menepa atutsü ta bilemer alitsü südi, saka ibala mesükba tesayutemji tatem nung mazük maru agi tembanger.
10. Nisungtem rongnung karibo temetetba kecha maliba ajanga 'Hajera Walla' anogoshia merang mapa inyakerang chiyonga tanurtem mesüa alir, aji oda pai ochishia inyakba ajanga par kibong	10. Saka kar kibong nungibo ochi mashiba rongsen agi tanurtem tajung aika mesüteta takar akümer, saka tanurtem rongnungi tashi temetet ka tanga

(Maneni asüing adok nung...)

NAGA NUNGER POLITICIAN-TEM DANG TAYONGZÜKBA OLA

- L. Kika Pongener.

(Yashi adok nungi...)

Ano tanü Center sorkar inyakyim jungjunga reprangdangra, Khristan-tem talitsü mesademsüsa sentong tapu balala atongba angudang kangasa tsüremseta bilemer. Talisa 'Christmas day' yabo International 'Holiday' amai alima ajungai metsüingareta amunger. Ajisüaka, iba anogo nung India lima nungbo 'Good Governance day' ta ser amungtsü lemteba osang angudang, aji shitak telemtetba agiba ka asünungbo, asen Naga lima ama Khristan-tem teimba aliba linuk ka atemabo tetsükdaksü alitsü amai bilemer. Ano tanü Competative Examination UPSC/SSC/Banking Service Exam. ajak Deobar anogo 'Temeshi Amungnu' nungang teimba agir, ajioda, asen Naga nunger kaketshirtema koda masüji oa agütsütsüsa akümer. Anungji India lima nung agiyongjia, asen Naga lima Khristan teimba aliba State nungbo NPSC/NSSB/Exam. & Interview kecha Deobar anogo nungbo magitsüla. MLA-60 pronglaji Khristan asünungji akokba tashi 'Temeshi Amungnu' meshiteta amungtsü wazüka ayutsü tangatetba alitsüla.

Ano nubur ajaki kanga sungmanga bilemba kaji, tawa agiba Election nubuyim sentong kar nung, "Praise the Lord"... "Haliluya" ta Slogan agütsüba, Social Media nung ngua kanga sungmangseta reprangogo. Iba-to shitak asünungbo, Naga nunger Politician-temi iba tashi sayatenyar no...????!...ta kanga aoksa-a bilemogo. "Praise the Lord"... "Haliluya" ta asüba o ya Tsüingrem tushia külemba o ka lir. Iba o ya Election nung 'Politics Slogan' den khenyongi memeyokteptsüla. Ano Naga lima tesem kar nungbo osangtajung ken agi Political Party ken amai kenjang melenshir atenba tesem ngua kanga sungmangseta bilemogo. Aji oda, iba amai benshiba angudang, Party 'Manifesto' nungji Christian yimsu anema 'Hidden Agenda' kar ali asü (?)...ta nuburtem nem temulung melemi bilemdaksür. Asenoki kanga junga meshisadanger dang ashi, asenok dangi sen ammer tatidang arutsü ta asüba... Tezü-tepo dener arutsü masü, iba ama mesukba mapa kar ajanga dang arutsü. Naga lima ama Christian State ka nung Tatar roker (60) prongla Khristan aliba linuk ka nung, iba ama mapa yabo metetsümonga mebeshitsüla. Naga nunger Politician-temi angatettsüsbaji "Politics & Religion" ana ya khenyongi memeyokteptsüla. Anungji Naga nunger Politician-tem ajak dang Khristan tamanger yimsusur aser lennir tajung ka-ka ama yimsusu asütsü aser anitsü nuburtemi akhanger.

Uttar Pradesh state nung pastor ana nem tai tonglokja puogo

March 09, 2023: South Korea nung Church of God-i ajungmesoba India nung pastor anati Khristan yimsü agizükdaktsüsi atema nisung aika mesüzüker, ta tai tonglokja puogo.

Uttar Pradesh nung police-i Delhi nungi aruba Pastor Rajat Kumar Shah aser Kanpur yimti nungi Pastor Abhijeet Mesih na March 4 nü puogo.

Osangbenertem den jembidang Deputy Commissioner of Police, Ravindra Kumar-i, Kanpur yimti kübok Chakeri jila nung sentong ka ayongzüka nisungtem Khristan yimsü dangi meyipdaktsüsi merangdar, ta nisung kari police nem osang metetdakja liasü, ta ashi.

Hindu nationalist telok Vishwa Hindu Parishad (VHP) aser parnok indang youth wing, Bajrang Dal nungi züngsem kari police nem iba osangji metetdaktsü.

Pastor ana- Shah aser Mesih na ya World Mission Society Church of God nungi lir, aser iba society ya 1964 küm South Korea nung tenzüka Church of God ajanga ajungmesoba lir.

Tena ket nungjagi Taiwan

oshi nung züluba kakat kar apu. Indian Penal Code aser Uttar Pradesh Prohibition of Unlawful Conversion of Religion Act kübok pastor ana anema ken o benokogo.

Kanpur police-isa tangar nisung pezüa apu saka tesülen chiokogo.

March 8 nü osangbenertem den jembidang Pastors' Association of Uttar Pradesh nung general secretary, Pastor Jitendra Singh-i, "State nung Pastor tem densema Khristantem apuba ya tang mezüng ataloker masü. Tamangba yimsü meyipdaktsü, ta tiyazü nung tai tonglokja tesüiba ita trok tsüngda police-i nisung 100 dak tema anema inyakogo," ta metetdaktsü.

Paisa, Kanpur, Fatehpur aser Bareilly nung Tenla ki ter shibangtsüogo, ta metetdaktsü.

New India Church of God nung züngsem Singh-i, "Police-i pusema Hindu nationalist telok balalai amokmerenba ajanga Khristantem tetsübu nung dang alir," ta ashi.

Taküm February 26 nüa Ghaziabad district nung police-i Pastor Santosh John aser pa kinüngtsü na apuba pai metetdaktsü.

Bajrang Dal-i tiyazü nung tai tongloktsüba nung ajemdaker

pastor o kinüngtsü na apu aser tang tashi tena jail nung puoka lir. Tena anema maneni March 10 nü ken o angadangtsü.

"Tang pua alirtemji tekaraba nung chioktsü atema onoki sarasademtsür," ta pai ashi.

Uttar Pradesh Prohibition of Unlawful Conversion of Religion Act ya 2020 küm November ita nung benoka liasü. Iba ozüng kübok "nisung shingaia yimsü memeyiptsüla mesüra tanga yimsü memeyipdaktsütsüla; yazü osang, tashiyim mesüzüka mesüra kibong akümba ajanga yimsü memeyipdaktsütsüla," ta shia lir.

Iba ozüng kübok kangshia tamangba yimsü meyipdaktsüba mesüra tamangba yimsü meyipdaktsüsi atema kibong akümba densema tim masüba lenmang balala ajanga tamangba yimsü meyipdaktsüba mapatem iba ozüng ajanga nokdangtsü, aser aibelenertem küm 10 tashi tepuokdak ayutsü akok.

Iba ozüng ajanga ashiba agi, "Tamangba yimsü meyiptsü atema dang tetsür kati kibong aküm süra iba kiyimbaji magila kümtsütsü, aser kibong akümba sülen tamangba yimsü meyipnertemi district magistrate dang tama asüngdangtsüla."

ANOGO ABEN TSÜNGREM DEN

TATEM MAKABA TEMEIM

Temeim kodanga majentsü. Shin O jembiba O-tem aliyonga aji süitema; bendanger oshi jembitetba asüyonga aji anenadoktsü, temetetba shisatsü süitemtsü. 1 Korint 13:8.

Korint arogo nung tashitemetet, shisatsü, kotaker oshi nung jembiba, sayutsüngitsü sempet, tamang tulu, miim O metetba sempet liasü saka temeim anünga aliba ajanga parnok tsüngda meputepi liasü.

O tsüngrosonga jembitetba aser tashitemetet sempettemji sayutsüngir, lokti lenir, yimsüsür, shishilembar, tesayur asoshi sobutsü tajungtiba. Shin O jembiba aser bendanger oshi jenbitetba ajanga tanela anir aruba nung takok tulu angur. Saka item sempet khen asoshi alima nung alidang amshitsü agütsüba, saka temeimbo tatem maka.

Sempet jenti aka saka temeim makaba ajanga mezümeküm, nükmerem, külakkü bong, mesütepi beshiba, pei asoshi bilemba poktetdaktsür saka temeim ajanga Khrista nung ka küma longjemdaktsür.

Temeim kodanga ajema makümtsü, mesamatsü aser mashioktsütsü. Alima nungi Kotaki temeim bener aotsü aser Tsüngrem den tejak O tejak na ngutepdang temeim nung teti tatem maka asoshi longjemtsü.

SARASADEM

Tatem makaba Tsüngrem, tatem makaba temeim kotak tashi bener arutettsü kü dak züindakjang. Amen

Indonesia nung Khristantemi tzümetsüng ajanga takoksa angurtem yarir

March 09, 2023: Indonesia nung Khristan nütsüng aika aliba province ka nungi Khristantemi anentsüh aser tzümetsüng lendong ajanga takoksa angurtem nem teyari agütsür.

Taoba ita iba lendong nung nisung asem asü aser nisung 5,000 dak tema jenshi.

Taoba hopta ka tsüngda East Nusa Tenggara province kübok Belu Regency nung Khristan lanurtem aser Atambua Arogoi peipei yimtsüng nung item lendong nung takoksa angurtem nem teyari agütsüogo.

February ita tatembanglen tzünglu sashia aruba den külemi

yipru ajanga nisung asem asü aser nisung 5,230 dak tema jenshi, ta Belu Regency nung Disaster Management Agency-i March 8 nü sangdong ka ajanga metetdaktsü.

Iba lendong nung ki 625 raksa, gari gari lenmang 9 raksa aser ali hectare 1,281 nung tsünüba aonsotsü raksatsüogo.

Arogoi Catholic charity telok- Caritas den senteper St. Gregory Nualain Parish nung relief center ka amenoka item lendong nung takoksa angurtem nem March 3 nü jang, noodles, amtsük, antzü aser sapon agütsü.

Caritas chairman, Maxi Sikone-i, takoksa angurtem nem maneni teyari agütsütsü atema ano tenla nüngdaker, ta metetdaktsü.

Belu nung Khristan lanur telok nung chairman, Octavianus Fatin-i, taoba hopta nungi parnoki chiyungtsü densema teyari oset balala bendener takoksa angurtem nem agüja arudar, ta metetdaktsü.

St. Francis Arogo nung putir, Yohanes Kristoforus Tara-i, tzünglu aser yipru lendong nung Arogo kiojen aika raksaogo aser tang tesüdak Tenla ki-aka raksaogo, ta metetdaktsü.

Nicaragua nung nisung meyirjang aikati Khrista agizük

March 09, 2023: Nicaragua linük nung arasentsürtemi atak- atemyonga sentong ka nung nisung meyirjang aikati Yisu Khrista agizükogo.

Taoba hopta Somotillo, Nicaragua nung aliba moapu ka nung Shake the Nations Ministries-i asentenshi sentong tuluka ayongzüka liasü. Iba sentongji anema yangji aliba arasentsürtemi iba moapuji atakatema liasü.

Shake The Nations Ministries-i Central America nung aliba Nicaragua linük tesem 17 nung "Buenas Nuevas Nicaragua" campaign agitsü ayongzüko aser parnoki Somotillo nung mezüng iba sentongji agia liasü.

Shake The Nations Ministries otsü nung tang mezüng local missions ministry, Mountain Gateway den senteper ayongzüka sentong tulutibaji ibai lir.

2006 küm Shake the Nations Ministries tenzüksang aser sayutsüngir, Nathan Morris-i facebook page ajanga, "Buenas Nuevas Nicaragua campaign kanga takok ngua tenzüko. Tanela Temeshi-i mapa tulu inyaka liasü," ta metetdaktsü.

"Khrista osangtajung prokba nokdangtsü atema arasentsürtemi iba moapuji atak- atema liasü, ajisüaka Judah Molusongzü arra taonung satan tamakok ngudaktsüogo. Teamaitsütem, sayatenya aser nisung meyirjang aika tekümtet anguba ajanga Yisu Khrista tashi sayuogo. Nisung ajaki apudaktsü! Somotillo ya Khrista atema!" ta pai lemsatop.

Morris-i, alu aruhtsü atema Nicaragua nung alu mena lir, ta ashi.

Taruba ita ana tsüngda pa leniba nung sentong pezü agitsü: Chinandega nung March 17-18 anogotem nung, Leon nung March 31-April 1, Esteli nung April 14-15 aser Ocotal nung April 28-29 anogotem nung pa leniba nung item sentong agitsü.

Shake The Nations nungi sayutsüngir, Mauricio Canales-i, "Nicaragua nung tanela aika Kibubar yimli nung züngsemogo," ta ashi.

"Nicaragua moapu nung tanela temeshii mapa tulu inyakdar," ta Morris-i ashi.

Nicaraguan campaign atema denomination balala nungi Arogo meyirjang aika aser pastor den Khristan lenir meyirjang aika longjema liasü.



Waromung Baptist Arogo nung Christian Education Ministry nung Senior tanurtem aser tesayurtem education tour ka, March 6, 2023 Sivasagar nung Godhola-i tenzüka arogo aser Ahom chubai yangluba kitem semdangdang agiba noksa ka yangi angur.

AO OSHI ANGAZÜKDAK: TANÜ ANGAZÜKTSÜBA OJANG



Pega

(n) mamatzü aser shini maden ajemba süngo (plain red tea)

* Nisung aikati chiyonger külen pega ajemer.

Pei

(n) kija, kisüng (self)

* Pei taküm junga alitsübaji pei dak aket.

OLONG PAITEP # 6451

Grid for OLONG PAITEP # 6451 with numbers 1-16 in various positions.

TIPILEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongsü adokdak - (3)

OLONG PAITEP # 6450 TELANGZÜBA

TIPILEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.



NAGA NUNGER POLITICIAN ASER ELECTION

- Osang Zülur : Mr. Alokba... Ner lima nung Election ya kechi dang ajar ...???
Mr. Alokba : Tetezü aika shitettsü...Saka ni tongtipang ka-ana dang shidi...
i. Angadi bendenba rongsen...Angadi nung endokba sabang.
ii.Sen aatsü... Aayangdak aser chidiyungdi-dak sabang.
Osang Zülur : Election nung sen aatsü... Aayangtsüba ya shirnok dang nungi angazük...Mesura nenok dang shirnoki sayu...???
Mr. Alokba : Ozü Naga nunger Politician-temi sayu... Anungji parnok dang nungi angazüka benshir adi.
Osang Zülur : Arreee...!!! Kodaser parnoki sayua ta ashir...??? Shiangjong...???
Mr. Alokba : Waaa...Rulling MLA-tema sen atema Minister menden rakteper.... Opposition-purtema sen atema Rulling sorkar den dennur...Anungji onoka Election shia sen aah-a aayanger adi.
Osang Zülur : Mr. Alokba...Naga nunger Politician-tem tang ya kechi tangatetba jenjang ka nung nokdaka lir...???
Mr. Alokba : Ayyeee...Parnok tang Yisu Khrista peladaksütsü asü... Modi-ba o Amit Shah na peladaksütsü... ta ratamataba tia nung lir...Kechiba sura tenaji peladaksü nungang... Sen aika agütsütsü ado...!!!???

Lilir -L.Kika Pongener.

SANGDONGER

Office of the EX. Servicemen Assam Riffle Association, Mokochung Unit ajanga members ajak dang kum tasen salem abener. Yaküm küm 17th Dec. 2022 Executive Committee Meeting nung lemtetba ama, taküm küm 24th March 2023 nung General meeting 23 Assam Riffle Community Hall, Near Imkongmeren Sports Complex Mokochung nung, alitsu. Anungji, Asaam Riffle Ex. Servicemen ajak 2023 kum atema membership, Rs 500/ bener arua meeting nung ajak medema adentsü metetdaksür.

President

Chuba Ao

EX. Servicemen

Assam Riffle Association, Mokochung Unit

Secretary

Repa Ao

EX. Servicemen

Assam Riffle Association Mokochung Unit

Meghalaya Assembly Speaker asütsü Thomas A Sangma shimogo

Shillong, Metsüremi/March 9 (Agencies): Meghalaya Legislative Assembly Speaker mapa abentsü atema Brehostibarnü North Tura MLA Thomas A Sangma shimogo.

Pai United Democratic Party (UDP) nungi Metbah Lyngdoh melener, shiba taoba term nung Speaker liasü.

Temetettsü kaji NPP-i aniba Meghalaya Democratic Alliance (MDA) 2.0 nung legislator 45 lir.

Opposition nung Congress, Trinamool Congress aser Voice of the People Party lir aser parnok MLA 14 lir.

Meghalaya Assembly atema election February 27 nü menden 60 nungi 59 atema agia liasü.

Mongolbarnü National People's Party (NPP) tir Conrad K Sangma-i, term



Thomas A Sangma

anabuba atonga Meghalaya chief minister mapa abentsü asoshi tenangzüktepba agiogo.

Angh Phagu Chauhan lenisüba nung iba tenangzüktepba sentong agia liasü, kong NPP nungi MLA tenet, UDP nungi ana aser BJP o HSPDP nungi MLA kaka Sangma indang cabinet nung minister mapa abentsü atema tenangzüktepba agiogo.

Tenangzüktepba agiba

sentong nung Ato Kilonser Narendra Modi, Union Home Minister Amit Shah, BJP tir JP Nadda aser Assam Chief Minister aser NEDA convenor Himanta Biswa Sarma nungeria shilem agia liasü.

NPP nungi Prestone Tynsong aser Sniawbhalang Dhar na deputy chief minister mapa abentsü atema tenangzüktepba agiogo.

NPP nungi cabinet ministers asütsü shimertem rongnung Marcuise N Marak, Rakkam A Sangma, Ampareen Lyngdoh, Comingone Ymbon aser A T Mondal nungera densema lir.

BJP nungi A L Hek, UDP nungi Paul Lyngdoh aser HSPDP nungi Kyrmen Shylla, aser Shakliar Warjri nungera minister mapa abentsü atema tenangzüktepba agiogo.

Manipur nung tetsürtem atema Sainik School ka amenoktsü

Imphal, Metsüremi/March 9 (Agencies): Manipur Chief Minister N Biren Singh-i ashiba agi, state kübok Bishnupur nung tetsür temeja atema Sainik School ka yakta lapoktsü.

Koirengei nung mega ex-servicemen rally sentong nung o jembiba mapang Chief Minister-i iba olen lemsatapa liasü.

N Biren-i ashiba agi, Indian Army ya tekümzükertem lir aser parnoki parnok kibongtem densema ajak toktsür linük tenzüker aser parnok dang akümtsübu sayutsü, tetushi agütsütsü aser parnok nongita yaritsüji nüburtem tinyaktsü mapa lir, ta ashi.

Ato Kilonser Narendra Modi-i 'Nation First' osang prokshiba indang jembiba mapang Chief Minister-i, lisopur ajaki linük kümzüka lira asenoka kümzüka lir ta angatettsüla anungji linükji ajak dang mezüngbuba südaktsütsü nüngdaker, ta ashi.

Maneni Biren-i Manipur nung Agniveer recruitment rally ayongzüka agitsü atema temelaba agütsüba atema Home Minister Amit Shah aser Defence Minister Rajnath Singh na dang kanga pelaba

Tetsür temeja atema Sainik School ka Bishnupur nung yakta lapoktsütsü ta pai ashiba den Manipur tsür tashi, bendanga agütsüba indang pai jembia liasü.

Major Jotin-i Afghanistan nung bendanga agüja inyakba aser Major Bob Khathing-i linük yangerba nung teyari agütsüba densema state nungi army temi pei taküm bendanga agüja inyakba aser teyari balala agütsüba indang jembiba mapang Chief Minister-i, state sorkari ex-servicemen office complex nung Martyrs' Memorial ka amenoktsü atema sen crore 3 intoktsü sentong yanglua lir, ajita asünungdang nüburtemi kümshia rara nung pei taküm bendanga agütsürtem nem tetushi agütsütettsü, ta ashi.

Maneni Biren-i Manipur nung Agniveer recruitment rally ayongzüka agitsü atema temelaba agütsüba atema Home Minister Amit Shah aser Defence Minister Rajnath Singh na dang kanga pelaba

lemsatep.

Paisa, State Cabinet-i, sorkar mapa atema nisung aniokba mapang Agniveers tem nem parnok mapa nungi anenba sülen tama maongka agütsütsü mulungtepa agizükogo, ta ashi

CM-i, nüburtem aser security forces na tsüngda tesendaktep tajungba kümogo aser tangbo tesunep nung lir ta ashi.

Kasa mapang nung Brig Neil John, Dy GOC, 57 Mtn Div-i ashiba agi, Manipur sobaliba kanga takar aser puti otsü nung Manipur nungertem tasü aitba aser bendanga agütsüba indang tetshir. Manipur nunger jala aser jabasotemi linük yangerba aser India Army nem teyari agütsüba ya tangar kübok masü, ta pai ashi.

Iba sentong nung Lt Gen (ret'd) LN Singh, tang tinyakdak aser mapa nungi anener aliba ketdangsürtem, Veer Nari aser ESM temi shilem agia liasü.

Manipur nung sen crore 5.44 alang temesepba mozü apu

Imphal, Metsüremi/March 9 (Agencies): Imphal branch customs ketdangsürtemi temesepba mozü shibelener ka puogo aser pa ket nungi sen crore alang bendanglen nungi bener aruba temesepba mozü puogo, ta official source kati Brehostibarnü metetdaksü.

Arrtsü adener bendanglen nungi osang tejangja ka angazükba sülen Customs Division, Imphal branch Anti Smuggling Unit-i, Bodhbarnü temulung melemi bilemsang ya Churachandpur district nungi Imphal leni Honda Activa ka nung mener aruya lia sot, ta

source-isa metetdaksü.

Nisungba ya sota ken o ashishiba mapang Myanmar nung yangluba WY tablets 54, 400 state-i bener arua amshia aliba nguteta liasü.

Temesepba mozü shibelensang den pai bena aliba temesepba mozütem ya Bishnupur district kübok Kwakta Bazaar nung Bodhbarnü apu, ta source-i Brehostibarnü metetdaksü.

Aija alisang ya Senapati district, Manipur, Sadar Hills Sub Division kübok Khamenlok Igejang yimtsüng nungi arishi küm 32 tain Gelmilang

Thouthang ta jangjaogo.

Source-isa, ken o ashishiba sülen G Thouthang-i, pai tang mezüngbuba temesepba mozü shibelener arutsü merangdangba liasü, ta ashi.

Ajisüaka custom ketdangsürtemi ashiba agi, pa Narcotics Drugs and Psychotropic Substances Act kübok aitsüiogo.

Iba dak sendakba nung ken o maneni bushisüngdangtsü atema aija alisang den temesepba mozü aser pai amshiba two-wheelers ya ketdangsürtem nem bendanga agütsüiogo, ta source-isa metetdaksü.

Afghanistan nung Taliban governor ka pokset



Afghanistan north tsütsü Balkh province nung bomb ka apokba tesem noksa nung angur.

Mazar-i-Sharif, Metsüremi/ March 09 (Agencies): Afghanistan north tsütsü Balkh province nung bomb ka apokba lendong nung yangji Taliban governor ka densema nisung asem asü, ta police temi ashi.

"Balkh indang governor Mohammad Dawood Muzammil densema nisung ana tanep iba lendong nung asü," ta police odongtar Asif Waziri-i Brehostibarnü ashi.

Waziri-i ashiba agi, provincial capital Mazar-i-Sharif nung pa indang office floor tanabuba nung iba bomb ya apok.

"Ibai takum bendanga agütsür inyakba lendong ka lir. Lendong agütsür ya komasür governor indang office tonga aruar osang mali. Iba lendong nung nisung ana yiru," ta pai ashi.

Iba lendong asoshi shingaiia tenüing agia mali saka Afghanistan nung Taliban yimsüsüba anemer telok tulubaji ISIL telok den sendaktepa aliba telok ka lir.

Iba tesem nung Muzammil

ya ISIL anema nokdaker nübu tejangja ka lir, aser pai linük yimtiba Kabul semdanga sorkar ketdangsür ajurur anogo ka lir iba lendong ya atalok.

2021 küm Taliban-i tanaben Afghanistan amokbangba sülen ketdangsür aika tepsetba rongnung Muzammil ya ka lir.

Taliban yimsüsüba aruba sülen Afghanistan nung azüdokshi kanga agi tajemba akum, saka ISIL temi lendong tulu kar agütsüba ajanga tensa mejungi lir.

Governorate nung ketdangsüri security talila yoka lir aser osangbener tem noksa tangoktsü memelar, ta iba lendong atalokba tesem anasa nungi osangbener kati ashi.

Muzammil ya Islam tsükchir temi tepset, ta Taliban sorkar indang odongtar Zabihullah Mujahid-i tweet ka nung ashi.

Mezüngbo Muzammil ya Afghanistan anüdoklen Nangarhar province indang governor inyaktü shim, kong pai anir ISIL den rara liasü, aser iba sülen taoba küm Balkh-i yok.

Northern Afghanistan nung irrigation project tuluka reprangshitsü asoshi Balkh semdang deputy prime minister ana aser ketdangsürtem pai Bodhbarnü ajurua liasü, ta sorkar sangdong ka ajanga ashi.

Taoba küm nungi Taliban sorkar asoshi security tsütsü ISIL ya tetsükdaktsü tulutiba kumogo, shirnoki Afghan civilian aser bendanger dak lendong timtem agüja arur.

Taliban-i Afghanistan nung yimsü asütsü nükjidong aliba melena 'global Islamic caliphate' amenoktsü meranger, ta ISIL-i ashir.

Taoba küm Mazar-i-Sharif nung atalokba densema Balkh nung lendong jenti ataloka arur aser kar iba telok yagi tenüing agia lir.

January ita Kabul nung foreign ministry anasa takum bendanga agütsür bomb pokloktsür kati nisung ter pokset, koba ISIL teloki tenüing agia liasü.

December ita Kabul nung shishilembar asoshi nungtugu hotel kati prangbong bena alirtem aita China nung nisung pongu tepset. Iba lendong ya ISIL-i tenüing agia liasü.

Ano December ita sa Kabul nung Pakistan indang embassy ka amak, koba Islamabad-i par ambassador tepsettsü merangba mapa ka lir ta ashi aser ISIL-i tenüing agia liasü.

September ita takum bendanga agütsür bomb pokloktsüba lendong ka nung Russian embassy nung inyaker ana asü, aser iba lendong ya ISIL-i agütsü ta par sasa tenüing agia liasü.

Georgia nung bill ka anema nüburtemi longkak ait

Tbilisi, Metsüremi/March 9 (Agencies): Georgia nung press nüjiso aser lokti tentet balala inyaksangshi aziükba bill ka Parliament-i pusemba sülen longkak aiterem aser police na tsüingda linük yimtiba Tbilisi nung mangatettep adoka liasü.

Riot police-i, parliament kima adenshia aliba longkak aiterem senshidaktsütsü atema water cannon aser pepper spray amshia liasü.

Longkak aiterem karbo ali nung longdaka akhetba nguogo aser tangertemi EU aser Georgia wako ayipshiba nguogo.

Sorkari ashiba agi, iba lendong nung police tem aika yiruogo aser parnoki bena aliba hadirtema aika raksaogo.

Iba bill ya alima kin aikati aitsüogo. Iba bill kübok non-governmental organisations (NGOs) aser independent media tem shirnoki bendanglen nungi senotsü teyari shilem 20 dak tema angur parnoki parnok ya bendanger agent tem ta sangdongtsüla.

Opposition temi iba ya Russia nung ozüing den kasa aser iba ajanga Georgia lokti tentet aser independent media inyaksangshi mejungi akümtsü ta shiogo.

US state department otongdar Ned Price-i ashiba agi, iba ozüing ya tetsükdaktsü tulu

ka asütsü aser iba ajanga Georgia nung temeden daka kongshitsü.

Georgia-i EU nung adentsü atema benoker aliba tang asadangba mapang ka lir aser EU foreign policy chief Josep Borrell-i iba bill ya EU den mapet ta tekümdangtsü metetdaktsüogo.

Russia-ia 2012 küm "foreign agents" law agizükogo aser kümtem tsüingda atsülangshia ogo, koba anüolen aliba linüktemi senotsü teyari agütsüba NGO aser media aziüktsü atema lir.

"Iba ya Russia nung ozüing ta ajaki meteta lir. Onoki ex-Soviet Union nung shilem ka mesüner, onok European Union nung dener, onok pro-West süner," ta longkak aiter kati Reuters news agency dang ashi.

Video ka ajanga Georgia tir Salome Zourabichvili-i pai longkak aiterem pusemba lemsatepogo. "Ni nenok den dena lir. Tanü nenok Georgia tenüing nung nokdaker. Georgia tarutsü Europe nung lir aser iba tarutsü ya shinga nema magindaktsütsü," ta pai ashi.

Ajisüaka parliament telung nung Georgia yimsü asüba Georgian Dream party nungi ozüing yanglur 76-i iba ozüing tasenba pusemogo.

Hombarnü iba ozüing angadangba committee ka

mangatettep adoker senshia liasü.

Iba ozüing agizükra Georgia ya Belarus, Tajikistan aser Azerbaijan amala undemocratic aser authoritarian post-Soviet states tem rongnung densemstsü, shirnoki Russia-i yangluba ozüing ajizüka NGO tem inyaksangshi aziüka arudar.

Russia aser Georgia nung "agent" ta asüba ojang ya itangiter aser linük ashioktsürtem atema amshir aser iba ajanga lokti tentet balalai inyakba maparen ya mashiymi angatetdaktsür. Linük aser lokti atema mapa tajung inyaker masü saka parnok ya bendanger tejangraba nung inyaksangshir ta shia arudar.

"Transparency of foreign agents" aser "registration of foreign agents" ta bill ana ya anti-Western People's Power movement-i parliament nung benok. Iba telok ya Georgian Dream party den kanga junga sendaktepa lir.

Iba telok yagi ashiba agi, tanabuba bill ya US Foreign Agents Registration Act (FARA) den kasa dang lir.

Georgian Dream party-i iba bill ana ya pusemogo aser ashiba agi, ochi mashi inyakyim ajak raktoktsü atema iba ya kanga tongtibang lir.

KIBONG KÜMER KÜM 50 AJUNGBA TEPELA ANOGOMUNG MARCH 10, 2023.



Wb. A.Senti Ozüküm & Wt.Narola Longkumer Temeim Oja & Oba,

Nenati Tsüngrem dak dang tamang yur kati ka den meimtepa taoba küm 50 tashi taküm yipru ajak kokteta aruba takok aser tepela anogomung tanü onoki pelaseta amunger. Nena meimtepa aruba taküm yimya onoki nükshir aser jangratema bilemer.

Tsüngremi nenaprongla nem ano maneni taküm aser mapang tajungtiba moajangma.

- Temeim Chirnur, Anük-apang & Semchirtem.

ABA, OBO TEPELA TASOBA ANOGO TEMSULIBA LONGKUMER (LONGJANG)



10th March 2023

Na Küm neter pongu (75) abensaba anogo nung onoki nü nem akum tetushi tulu agutsr. Na iba akumlir lima nung maneni teyanglur Tsüngrem-i tetemjen taküm arishi moajang "Tambur akümdang nai ni tesendok, tashi makai akümdang nai ni senzüka teyutsü". T.Ken 71:9.

- Temeim kinungtsü, Chirnur- Semchirtem aser Anükapangtem

NCM Mex

NAGALAND CONSERVATORY OF MUSIC EXTENSION PROGRAM

AN OPPORTUNITY FOR MUSIC ENTHUSIASTS OF ALL AGES TO COME AND LEARN FROM NAGALAND CONSERVATORY OF MUSIC FACULTY & STUDENTS

MUSIC LESSONS
VOICE PIANO GUITAR

SHORT TERM MODULES
CONDUCTING MUSIC THEORY SONG WRITING

FOR INQUIRIES, CONTACT
Vini Assumi Program Coordinator
+91- 9366239275

LOCATION
GB H/NO 5. (1) B-BLOCK, DAROGAPATHAR, DIMAPUR
3rd mile - Nagarjan Road

Indonesia nung football match officials ana tepuokdaki yok



Arema FC organising committee mendenbuba Abdul Haris aser Security Officer Suko Sutrisno na okadak nokdakba noksa nung angur.

Surabaya, Metsüremi/ March 9 (Agencies): Football asaya puti otsü nung stadium nung lendong tamajungtiba ka ajangshiba dak sendakba nung pei mapa shitak minyakba atema Indonesia nung okadak kati football match ketdangsür ana Brehostibarnü tepuokdaki yokogo.

East Java kübok Malang yimti nung taoba küm October ita nüburtem ground telungi senoka aitba sülen police-i nisung sünga mena aliba stand tem nung tear gas khaloktsü aser iba sülen nisung 135 süa liasü.

Nisung noklang aika kishi temesütem nungi kimai tugutsü merangba mapang ajemset aser tangola mesashiteti asü, kong tanur 40 dak tema densema liasü.

Pei mapa shitak benoka minyakba atema asaya ayongertem rongnungi Abdul Haris, ya ita 18 tepuokdak ayutsü obendang agütsüogo. Prosecutors temi pa küm trok ser ita ti tepuokdak ayutsü khanga liasü.

"Ni defendant ya küm ka ser tesa dang tepuokdak ayutsü obendang agütsür," ta presiding judge Abu Achmad Sidqi Amsya-i ashi.

Iba lendong atalokba sülen tang mezüngbuba obendang ka agütsüogo.

Obendangertemisa security ketdangsür Suko Sutrisno-i pa mapa shitak minyakba nguteta

küm ka tepuokdak ayutsü obendang agütsüogo.

"Taoba mapang mepet mesü atalokba ken danga ajangshidanga mali asünung defendant temi mepetmesü adoktsü imla maliasü. Defendant-i security ketdangsür ka ama pa mapa mangateti liasü," ta obendangeri ashi.

Tenaprongla nem temebishiba benoktsü atema anogo tenet latettsüogo.

Kasa mapang nung iba tatalokba dak sendakba nung local police ketdangsür asem aitsür lir aser tang obendangtsü ataba mapang ka lir.

Indonesia indang premier league achayangba company indang taoba director-a temulung meleme bilemertem rongnung züngoksema lir aser pa dang police temi maneni ken o ashishidar.

Police-i, October 1 nü mepetmesü adokba ya riot ka ta ashiba den iba lendong nung police office-a ana süogo ta ashi, ajisüaka lendong nungi jenbortemi police temi tashi alia amshi ta shia parnok aitsüogo.

Stand tem nung kecha taochi makai tear gas mekaloktsü tsüngda ketdangsürtemi supporter tem dak tetsüng agi metsüba aser azükba nguogo.

FIFA-i stadium telung nung iba amala tazüokba yimya benshiba magizüker.

Iba lendong atalokba ajanga domestic asayatem nung lenla

balala nung tamakok aika ajangshia aruba Indonesia nung ketdangsürtemi agizüktsüsa aküm. Indonesia nung infrastructure majungba, league shidak achayang masüba aser azütokshi lendong balala atalokba agi mapangshia timtema arudar.

Iba lendong atalokba sülen Indonesia indang National Police-i, Malang yimti aser East Java province indang local chief tem ampa nungi anenja liasü.

Sorkarisa football tetoktepba ajak anentsüogo, saka fan tem medeni league asayatem taoba ita tenzükogo.

Indonesia tir Joko Widodo-i, ken o bushisüngdangtsü atema tetuyuba agütsüogo aser FIFA standards dak ajemdaker Kanjuruhan Stadium raksar yanglushitsü tenanzükba agütsüogo.

Iba lendong atalokba bushisüngdang task force kati Indonesia football association tekolakba aser executive committee züngsemtem ajak mapa nungi anentsü atema ayongzükogo, ajisüaka parnoki mapa toktsütsü ayongzükba magizüki liasü.

Iba asaya ya Arema FC aser Persebaya Surabaya na asaya aser Arema-i goal 3-2 agi makok.

FIFA tekolakba Gianni Infantino-i October ita iba lendong ya football asaya puti otsü nung ajak dang tamangtiba anogo ka ta ashi.

Taoba Canada nunger Olympians temi takhangba ka agütsü

Metsüremi/March 9, 2023 (Agencies): Asaya nungi anener aliba Canada nunger Olympians 40 dak temai Canadian Olympic Committee (COC) dang parnok telemtetba melenshia Russia aser Belarus nunger asayatem 2024 Olympic Games nung asayadaksütsü atema pusemba agintsü takhangba ka agütsüogo.

International Olympic Committee's (IOC) Executive Board-i January ita Russia aser Belarus nunger asayatem 2024 Olympic Games nung tokteptsü atema lenmang lapoktsüogo aser asayatem shinga parnok indang passort dak ajemdaker asaya nung shilem magitsü atema tenokdangba magütsüsüla, ta ashi.

IOC-i Russia aser Belarus nunger asayatem Paris Summer Games nung "neutrals" tem ama shilem agidaksütsü atema telemtetba agiba ya COC-ia pusemogo.

Russia aser Belarus nunger asayatem Paris Games nung asayadaksütsü atema pusemba asoshi COC aija asayatem aikati shiti züluogo, ta CBC News sangdong ka ajanga metetdaksü.

"2024 Paris Olympics nung 'neutrals' tem ama tokteptsü atema Russia aser Belarus nunger asayatem atema lenmang bushiba pusema COC-i osang lemsatepba onoki aitsür," ta taoba amapang

asayatem yagi ashi. "Neutral ama tokteptsü atema Russia aser Belarus nunger asayatem nem kishi lapoktsüba ajanga Russia-i Ukraine amakba ya COC-i joko kecha süoki ia magir ta sayur.

"Russia nungertem Ukraine nungi matsüngin tashi Olympic Games nung Russia mesüra Belarus nunger asayatem toktepdaksütsü atema lenmang kecha mebushitsüla."

"International asayamungtem nung shilem magidaksüba ya parnok indang passport dak ajemdaker asayatem nem tenokdangba agütsüba dang masü iba ya ozüng alema inyaksangshiba aser rara tenzükba atema sentokba temaitsü ka lir aser geopolitics nung international sports-i shilem agiba temaitsü lir," ta parnoki ashi.

Canada densema linük 35-i taoba ita sangdong ka ajanga, mapa küma inyaktettsüsa neutrality model tejangja ka mebenok tashi Russia aser Belarus nunger asayatem tetoktepba balala nung shilem agidaksütsü memulunger, ta ashi.

Iba shiti dak sendakba nung telangzüba agütsüba mapang COC-i, onok tamendakdak masetshi-i lir aser linük anaprongla nungi asayatem nem tenokdangba agütsüsüla, ajisüaka "workable neutrality model" ka atema lenmang sadema lapoka toktsütsü nüngdaker, ta ashi.

Bayern aser AC Milan na Champions League quarterfinals-i iogo

Metsüremi/March 9, 2023 (Agencies): Bodhbarnü Bayern Munich aser Paris Saint-Germain na Champions League round of 16 tanabuba leg asaya Bayern-i goal 2-0 agi koka quarter-finals-i iogo.

Asaya nung Eric Maxim Choupo-Moting, shiba 2020 küm Lisbon nung Bayern goal 1-0 agi makokba Champions League final asaya nung PSG nungi asaya liasü pai iba asaya nung mezüngbuba goal idakja liasü.

Thomas Mueller-i Marco Verratti ket nungi parnok indang penalty area nung ball rakzüka agütsüba sülen Choupo-Moting-i goal idakja liasü.

Iba sülen asaya tanabuba shilem nung substitute Serge

Gnabry-i minute 89buba nung tanabuba goal idakja parnoki iba asaya aggregate nung 3-0 agi koka liasü.

Taoba küm 15 tsüngda Bayern puri CL quarter final 13benbuba tongtetogo aser kasa mapang nung PSG puri tang tashi nung iba asayamung ken danga koka mali.

Asaya mezügbuba shilem nung Matthijs de Ligt-i goal line nung ball ka kanga junga metsütoka liasü ajisüaka iba dak alia parnok nem PSG puri kecha timtem magütsü aser Kylian Mbappe aser Lionel Messi natia balaka junga masayateti liasü.

PSG pur atema tia maka iba asaya nung Neymar yirur aliba ajanga mezüng nungi masayatet aser defender Marquinhos aser

Nordi Mukiele nata yiruba ajanga asaya tembangba masayatet aser iba ajanga team jenjang mejungi aküm.

Kasa mapang nung Tottenham aser AC Milan na round of 16 tanabuba leg asaya goal 0-0 nung tembangba sülen AC Milan pur quarter-finals-i iogo.

Conte-i aniba team yagi goal idaksütsüsa maangka yangluteta masaya aser iba den asaya atemtsü minute 12 anunga lia Cristian Romero yellow card tanabuba chia asaya nungi tugudaksüba ajanga parnok jenjang mejungi aküm.

Leg asaya ana asayaba sülen goal ka agi takok ngua Milan pur küm 12 sülen tang mezüngbuba quarter-finals-i iogo.



Ahmedabad nung Test asaya mezüngbuba anogo tembangba sülen India, asayaba tesem nung aser rongsenketzung nung cricket super power ka küma aoba atema Australia nunger nungtugu asayar Allan Border-i tenüngsang agüja liasü. Kümtem tsüngda India team formate ajak nung ICC Rankings nung temaba jenjangi tuogo aser Australia nunga asayamung atonga kokogo, ta pai ashi.

BILEMDANGANG
"Shirangeri inyaktettsü mapa kecha mali."